

■ TRIBUNA POLITICA

Na a «No-Billag» or da vista da la populaziun grischuna

DA MARTIN SCHMID, CUSSEGLIER
DALS CHANTUNS (PLD GR)

Damai ch'i n'ha betg dà ina votaziun dal pievel il mais da november ha la discussiun davart l'iniziativa «No-Billag» cumenzà baud. Da tge sa tracti?

L'iniziativa dal pievel «Gea a l'aboliziun da las taxas da radio e televisiun» (aboliziun da las taxas da Billag), uschia vegn l'iniziativa numnada perquai ch'ella vul stgassar las taxas che vegnan incassadas dal post d'incasso Billag.

Aprima vista para l'iniziativa d'avair en mira las taxas da recepciun (Billag). Sia vaira intenziun è dentant l'aboliziun resp. la destrucziun da la SRG/SSR sco purtadra d'in radio e d'ina televisiun independenta en quatter linguas ed ina nova furmaziun da la cuntrada da medias en Svizra.

Jau refus l'iniziativa «No-Billag». Ella è memia radicala. Igl è bain necessari da manar ina discussiun da principi davart il cuntegn e la dimensiun dal service public entras la SRG, dentant betg davart sia aboliziun. La SRG gioga in'importanta rolla per la coesiun da las quatter regiuns linguisticas da la Svizra. Tant è tschert. Ils iniziants sa concentreschan memia fitg sin las grondas citads. I



dovra dentant er in'egliada specifica sin ils arguments da la populaziun rurala.

Igl è numnadain memia pauc enconuscent che la populaziun rurala perdess entras l'iniziativa «No-Billag» ina gronda part da ses service public. 34 staziuns localas e regionalas da radio e televisiun fissan periclitadas essenzialmain en lur existenza e stuessan vegnir serradas. Oz rapportan quests emetturs davart las activitads politicas, culturalas, economicas e sportivas da las regiuns pertutgadas.

Cun acceptar l'iniziativa «No-Billag» vegniss la cuntrada da medias da la Svizra transformada radicalmain. Gist en regiuns periferas muntass quai la fin dal provediment da basa medial. Programs independents da radio e televisiun en la Svizra romanda, en il Tessin ed en la Svizra rumantscha giessan a perder.

Oz vegn numnadain ina gronda cumpart essenziala da las taxas transferida en questas regiuns linguisticas.

Era per mai èsi cler: I dovra ina debatta davart la cuntrada da medias futura en Svizra, davart la rolla da la SRG/SSR e cunzunt era davart il consum futur d'infurmaziuns en ina epoca digitala. Per la lavur schurnalistica sa tschentan en quest connex dumondas essenzialas tar il service public, tar ils cuntegns, tar ils programs e tar la repartiziun da las taxas tranter las medias statalas e las medias privatas. Questa discussiun è necessaria e na dastga betg vegnir renviada. I dovra dentant ina debatta ordinada senza dar cun il mogn da questa iniziativa radicala «No-Billag».

Il parlament federal cumenza anc en il decurs da quest onn cun la lavur vi d'ina nova lescha da medias. Là duain vegnir tschentads ils binaris per il svilup futur da las medias. L'iniziativa dal pievel «No-Billag» è memia radicala ed ella anticipescha senza balsegn questa procedura.

Quai è er in dals motivs pertge ch'il parlament federal recumonda cun tanta evidenza da refusar questa iniziativa. Cunzunt en il cussegl dals chantuns è l'iniziativa stada senza la minima schanza. Quai duai era persvader vus.